

8. DIRLJIV UZLET DUHA

(10. februar 1984)

Požurio je, očigledno, prvi čovjek Organizacije Ujedinjenih nacija, Haviar Perez de Kueljar, da što prije do Sarajeva stigne njegovo ushićenje sarajevskom afirmacijom olimpijskog duha na najbolje mogući način. Organizatorima XIV ZOI Sarajevo '84, putem Branka Mikulića, predsjednika Organizacionog komiteta, uputio je čestitku neposredno nakon glamurnog spektakla otvaranja Igara na stadionu „Koševo”. Tu je rečeno ovo:

- „...U doba povećane međunarodne krize, zadovoljstvo je da oči svijeta mogu posmatrati inicijativu motivisanu plemenitim duhom miroljubive saradnje i prijateljstva među narodima. Dirljivo je da se takva proslava dešava u istorijskom gradu Sarajevu...”

Jučerašnja De Kueljarova ekspresna poruka pročitana je istog dana (9. februar 1984) na takođe ekspresnoj press-konferenciji u Organizacionom komitetu Igara. Susret sa bulumentom novinara, bilo je očito, nije tražio, niti je intrigirao, nikoga kada je u pitanju tek minula svečanost otvaranja Sarajevske olimpijade – za predstavnike mass-medija naprosto nije bilo ničega što je bilo pod upitnikom; ničega nedefinisanog, nejasnog ili upitnog. Novinari su to, uostalom, veoma povoljnim, pozitivnim tonovima ocrtali u svojim izvještajima, komentarima i emisijama nakon završenih, svečarskih fanfara spektakla otvaranja Igara na „Koševo.”

Samo površan i djelimičan uvid u prispjele preglede novinarskog pisanja i izvještavanja jasno dokazuje zašto je ova press-konferencija trajala svega deset minuta.

U naslovu izvještaja sa otvaranja Igara u ženevskom „La Suisse”, na primjer, stoji da je očigledno da će „Sarajevo idućih dana biti prijestolnicom svijeta”.

Italijanski listovi donose obilje informacija, komentara i novinarskih pikanterija, nabrajajući sarajevske rekorde po broju učesnika i broju onih koji će pratiti televizijske prenose svijetu.

Briselski „La Dernierheure” naglasak daje na tvrdnju da će „sport u Sarajevu biti jedini pravi pobjednik”. Američki listovi „Washington Post”, „Baltimore Sun”, „Los Angeles Times” i „Washington Times” donose na dvije-tri stranice izvještaje iz Sarajeva.